I gib's afoch ned zua

Text: Tom Lackner

Paßt's auf, Kinda: I gib eich jetzn an guad'n Rot auf'm Weg:

1. Do geh r i ins Kino, und gib ma r an Füüm

En neichng "Dschoadsch Lukas", wo fost nua mea Robota schbühn

Zwaa r a hoib Schtund nua Gemetzl und Schmoitz

Mit an Mauds-Heppy-End, und en Publikum gfoits

Davon hob i scho sowos von gnua

Nua r i gib's afoch ned zua

Refr. I gib's afoch ned zua

I gib's afoch ned zua

A so a Trottl-Kuitua

Oba r i gib's afoch ned zua

2. De Frau von mein Schef hot a Figua, de is Wöd

Und kaum is ea fuat, heast, do bin i scho gschdöht

Und wia r i grod richtich intim wea mit ia

Do schdeht a mei Schef - oisa ia Maunn - in da Tia

Jetz frog i mi echt, wos i tua ... I waass!

I gib's afoch ned zua

Refrr. I gib's afoch ned zua

I gib's afoch ned zua

Des is jetz peinlich wia nu

Oba r i gib's afoch ned zua

3. Wea Sichaheit groß schreibt, soit Meacedes nua foan

Und oiss, wos do sunst no so gibt, des kaunn ma si eigantlich schboa

Wöe Sichaheit is hoit a schtoak's Argument

Und ned vielleicht, daß a ma r a guade zwaahundat rennt

Do kennts mi heckaln in aaana Tua

I gib's afoch ned zua

Refr. I gib's afoch ned zua

I gib's afoch ned zua

Do bin i eisan und schtua

Und gib's afoch ned zua

4. I bau mi mi'n Auto diskret iangdwo ein

Oba sichalich ned, heast, weng de drei Viatl Wein

Mit an Ziagl aum Schteia is außadem echt ka Delikt

Do wea r i scho pockt und glei zum Aumtsrichta g'schickt

Dea tunkat mi ein, oba i sog eam nua

"Hean's, i gib's afoch ned zua"

Refr. I gib's afoch ned zua

I gib's afoch ned zua

I kriag bein Saufm ned gnua

Oba r i gib's afoch ned zua

5. I kennt Eich no füh soiche Gschichtln dazöhn

Oba i wüh Eich ned wiaklich üba Gebüa guöhn

Mit dera Kunst, wia ma si söwa bescheißt

Und dabei ois anziga de Woaheit ned gneißt

Von Lug und Betrug wiß' ma ollesaumt gnua

Nua mia gem's afoch ned zua

Refr. Mia gem's afoch ned zua

Mia gem's afoch ned zua

Von ana Einsicht ka Schpua

Wöe mia gebm's wiaklich und ealich und sichalich afoch ned zua

Losst's eich des g'sogt sein, liebe Mädl und Bubm. Wöe so kummt ma raum best'n duach's Lem ...